


ЕР ЕСІМІ – ЕЛ ЕСІНДЕ

Ұлы Отан соғысы ардагерлерінің ерлігін әруақытта құрметтеп, есте сақтау – бүгінгі ұрпақтың парызы. «Біздің жүрегіміз темір емес. Бірақ біздің кек отымыз қандай темірді болса да ерітіп, күйдіріп жібере алады. Біздің үрейді жеңетін ең күшті қаруымыз бар, ол – Отанға деген сүйіспеншілік» - деп жазған даңқты батыр Бауыржан Момышұлы.

Міне, Ұлы Отан соғысының жеңіспен аяқталғанына да 78 жыл өтті. Ержүректілік пен төзімділікті паш еткен Жеңіс күнін жыл сайын М.Әуезов атындағы ОҚУ әскери кафедрасының оқытушы-профессорлық құрамы, студенттері үлкен дайындықпен өткізеді. Дәстүрлі «Ашық есік» күні, әскерилендірілген эстафеталар мен кездесулер ұйымдастырылады.

Сондай кездесудің бірінде ұрпақтары өз аталарының ерлігін еске алды. Әскери-патриоттық тәрбие сабағында әскери кафедрасы студенті Тимур Исаев нағашы бабасы Ұлы Отан соғысының ардагері Федор Иванович Павликов туралы мақтанышпен әңгімесін айтты.

Федор Иванович 1926 жылы 21 қараша айында дүниеге келген. 17 жасқа толған сәтте Қызыл әскер қатарына Қызылорда облысы Чилик аудандық әскери комиссариатынан шақырылған. Әскери киімімен 19 желтоқсан 1943 жылы суретке түскен фотосын ата-анасына жіберіп, «Байрам-али» жер бедері деп жазған. Соғысқа бару үшін ол жасына бір жасты қосып, атыс дайындығынан өткен. Соғыс кезінде байланыстырушы қызметін атқарған. Соғыстан кейін үйленіп, екі ұл тәрбиелеп, өсірді. Немересін қазақ ұлтына ұзатып, интернационалдық бөрекеді отбасының ұйытқысы болды.



Ф.Павликов Мұғалімдер институтының (қазіргі ОКМПУ) түлегі. Ол институттың «Жалпытехникалық пәндер» кафедрасында және М.Әуезов атындағы ОҚУ оқытушысы болып қызмет еткен. Әскери кафедра, университет ұжымы ҰОС ардагерін назардан тыс қалдырмай, жыл сайын Жеңіс күнімен құттықтап қайтатын. Ф.Павликов 2016 жылы дүние салды.

Ұлы Отан соғысы халқымызға төнген ең ауыр күндер болды. Төрт жыл, 1418 күн мен түн бойы өз жері мен Отаны үшін, келешек ұрпақ үшін жан қилы соғыс жүріп жатты. Сол кездегі Кеңес Одағының басқа халықтарымен бірге жауды талқандап, жеңіске жету ісіне қазақстандық халқы да өзінің лайықты үлесін қосты. Қазақстандық жауынгерлер Брест қамалынан бастап Берлинге дейін барды. Олар Сталинград түбіндегі жертөлелерде, Днепр өткелінде, Москва мен Ленинград үшін болған ұрыстарда ерлік көрсетті. Ұлы Отан соғысы жылдарында біздің батыр бабаларымыз қатыспаған бірде-бір үлкен шайқас болмады.

Бүгінде жыл сайын Ұлы Отан соғысына қатысқандардың саны азайып келеді. Сондықтан, халқы үшін жанын пида еткен ата-бабаларымызды құрметтейік. Ардагерлеріміздің ерлігін ұмытпағанымыз жөн, себебі тарихын ұмытқан халықтың болашағы жоқ.

**Жеңіс АЙДАШЕВ,
М.Әуезов атындағы ОҚУ
әскери кафедрасының
аға оқытушысы,
запастағы капитан**